

# NÛREDÎN ZAZA

## Keskesor



NÛDEM



**NÛREDÎN ZAZA**

**Keskesor**

**Kurteçîrok**

**Weşanên NÛDEM**

Weşanên NÜDEM: 6  
Keskesor  
Çapa Yekem : Stockholm 1995

© Weşanên NÜDEM  
Pergala berg û rûpelan: NÜDEM  
Wêneya bergê: Bahram Haco  
Wêneya N. Zaza ji kovara Hêvî  
ISBN: 91-88592-065

Navnîşan:  
Termov. 52. 2 tr.  
177 75 Järfälla-Sweden  
Tel û Fax: 8-58356468

# **NAVEROK**

- 5 Nûredîn Zaza û Kurteçirokêñ Wî**
- 17 Xurşîd**
- 19 Derketî**
- 22 Gulê**
- 27 Keskesor**
- 32 Stêrk**
- 38 Perîşanî**
- 41 Hevîna Perîxanê**
- 48 Xatûn An Piling**
- 53 Dê An Xûşk**
- 55 Şerê Mêşa**



## NÛREDÎN ZAZA Û KURTEÇİROKÊN Wî

Dr. Nûredîn Zaza, yê ku di nav korna hevkarên Hawarê de yê herî xort bû, jiyana wî jî mîna ya pir ronakbîrên kurd trajîk; lê bi rûmet, pîrhîl, rengûn, bi tecrubeyan tijî û dewlemend derbas bû. Wî ji welêt bêtir dûrî, xerîbî û sîrgûnî dît. Hê di deh-yanzdeh saliya xwe de mecbûr dimîne, digel kekê xwe Dr. Nafiz cih û warê xwe terk dike, ji ber zîlm û zora tîrkan, ji ber taqîbkirin û stemkariya polisîn wan nake der, riya azadî û rizgariya xwe di revê de dibîne. Ew û kekê xwe Dr. Nafiz baz didin û derbasî Sûriyê dîbin. Ew pêşî diçin Helebê, paşê jî bi alîkariya hin kurdêñ nas û welat-hez li Şamê bi cih dîbin.

Nûredînê biçûk û kekê xwe demekê ji hev diqetin. Ji ber ku kekê wî doktor bû û welathezekî dilşewat bû, ji bo ku ew alîkariya kurdan bike, wan derman û derzî bike; ya girîngtir jî wan ji nezanî, belengazî, perîşanî û bindestiyê rizgar bike, berê xwe dide beriya Cizîrê û li wir di nexweşxaneyekê de wek bijîk û di nava gel de jî wek mamosteyekî azadiyê dest bi xebatê dike.

Nûredînê Biçûk, lê yê ku niha di dibistana fransizan de xwendîye û xwe gihandiye, bûyerên Tirkîyê roj bi roj taqîb dike û dilê wî her ji bo gelê wî lêdixe. Loma, bombebarandina dewleta Tirk ya li ser Dêrsimê tehmûl nake, ji bo protestokirina van kirinêñ dewleta Tirk, bi hin hevalêñ xwe re (ku paşê di bin navê Hêvî de komeleyekê ava dîkin) li sefareten hin welatêñ Ewrûpayê digerin, ji bo piştgiriya gelê kurd û lidijderketina ordiya hov, ji wan alîkariyê daxwaz dîkin.

Nûredîn Zaza li gelek welatan digere. Pêşî Sûrî, paşê Iraq, Lub-

nan û Siwîsrê... Ew di vê gera xwe de, an jî di vê jiyanâ xwe ya sirgûnê de gelek tade û neheqiyê dibîne. Ew di zîndanên kûr û tarî de hesreta çirûskek roj dikişîne. Ew jiyanâ wî sirgûnê, tade û neheqiya ku lê dibe wî hê bêtir li xebatê gurr dike. Ew bi mamosta Cegerxwîn re dibe yek û bi helbestên wî, ku wê demê jî bo kurdên razayî zengilê şiyarkirinê bû, pê xelkê ji xewa nezanî û kirêt şiyar dike; bi Osman Sebrî re, ku ew jî weke wî mecbûr mabû, welatê xwe terk kiribû û li Sûriyê bi cih bûbû, yekemîn car, di sala 1957'an de bingehê Partiya Demokrat a Kurd (P.D.K.) datînin. Berî lidarxistina Partiyê, ew li Ewrûpayê, di sala 1949'an de bi hin hevalên xwe re "Komela Xwendekarên Kurd Li Ewrûpa" ava di-kin û berpirsiyariya wê jî hildigire ser milên xwe. Bi avakirina vê komelê re gelek êrîş têne ser Nûredîn Zaza. Ev êrîş ne bi tenê ji welatên dagîrker, herweha ji komunîstên dogmatîk yên welatên dagîrker jî dihatinê. Van celeb komunîstan Nûredîn Zaza bi nas-yonalîstî sûcdar dikirin û xwe jî bi ûnternasyonalîstî didane pêş. Lê, ew ûnternasyonalîstiya wan, hindik ba jî, dîsan gelê kurd jê destekewti nedibû û jê bi qasî misqalekî fêde nedidît.

Nûredîn Zaza di sirgûnê de her sirgûn dibû, xwe nedida dest, dîlî û bêdengî nedipejirand; her li ber xwe dida, her dixebeitî... Wek mînak; li Sûriyê partî danî, li Swîsrê komele ava kir û rojnamaya bi navê "Dengê Kurdistan" derxist, li Bêrûdê berpirsariya radyoya kurdî, ku bermaya Mîr Kamiran Bedirxan bû, girt ser mi-lê xwe.

Vî ronakbîrê kurd ê bi rûmet, tu carî li ber zilm û zorê, neheqî û pîkoliyê serî dananî. Lê mixabin, kansera kambax pençê xwe avête vî camêrê rûspî, seriblînd, zana û têgihiştî û li xerîbiyê serê wî danî. Vê zerara mezin dostêن kurdan xemgîn û dijminêن wan jî



dilşa kir.

Dr. Nûredîn Zaza heta bi wefatkirina xwe ji li Swîsrê dima. Ew li wir bi jineke swîsrî re zewicî bû û bavê lawekî bû. Ew li welatê xwe yê sirgûnê doktora xwe li ser “Herikîna Personalist di rama-na filosofê fransiz Emmanuel Monnier” de dike û ji bilî xebatên xwe yên milîtanî û siyasi jî gelek bend û nivîsên bi kurdî, erebî û fransizî dinivîsîne û pirtûkeke helbestan bi navê “Şerê Azadî” çap dike. Du pirtûk jî bi fransızî “Contes et Lé gendes du Kurdistan” û “Ma vie de Kurd” derxistine. Romana Ereb Şemo wergerandîye, destana kurdî “Memê Alan” digel pêşgotineke dirêj û bedew amade kiriye û hê jî gelek tiştên wî yên neçapkirî hene.

Lê, digel hemû tiştan, digel xebatên wî yên siyasi, nivîs, bend û pirtûkên wî jî, dîsan ji bo min tiştên herî balkêş li ba Nûredîn Zaza, çîrokên wî ne. Ew di aliyê nivîsandina çîrokan de xurt, têghiş-tî û li gorî dema xwe nûjen bû. Hê di bîst û du saliya xwe de gava çîroka wî ya yekemîn “Xurşîd” di kovara Hawar, hejmar 27, 15 Nîsan 1941’ê de derketibû, ez bawer im dê pir kêfa xwendevanên Hawarê hatibe.

Ev çîroka wî ya ku di bin navê Nûredîn Üsiv de hatiye nivîsan-din, di derheqa peyakî bi navê Xurşîd de ye. Xurşîd dewlemendê gund e. Rojekê ji vî dewlemendê gund re lawek çêdibe. Ev camêr ji bo navê lawê xwe diçe mala meleyê gund. Mele peyakî welatbez e û navê wî Cemşîd e. Ew vî navê xwe yê şîrîn diyarî lawê Xurşîd jî dike. Xurşîd bi vê yeka han pir dilşa dibe û bi kêfxweşî ji ba me-lê dide rê û diçe malê.

Piştî şanzdeh salan, ji bo ku lawê Xurşîd, Cemşîd, bi serfirazî di-bistana xwe xelas dike, bavê wî ji bo dayina mewlûdekê dîsan di-

çe nik melê. Mele dîsan bi rûkenî Xurşîd qebûl dike û ji bo serfîra-zî û zîrektiya lawê wî mewlûdeke kurdî dixwîne.

Piştî heşt salêن din, vê carê jî Xurşîd ji bo mehra lawê xwe diçê mala Melê. Mele bi kêfxweşî mehra wî jî dibire. Heya berî ku kûrê Xurşîd, Cemşîd, bi dû destikên keştiya xwe di avê werdibe û difetise, Xurşîd wek xortekî bextiyar e. Ew dilşa ye, bi hêvî ye, xurt û li ser xwe ye. Lê piştî windakirina kurê xwe, yê ezîzê ber dilê xwe, Xurşîdê weke çiyayekî dikeve, kal dibe, rû lê diqermiçe, pişt lê ditewe û por û rih lê spî dibin. Û bi wî awayî diçê ba melê, bi stûxwarî wê nûçeya reş digihînê. Meleyê ku hem zane ye û hem jî welathez e, Xurşîd teselî dike, ew bi zanebûna xwe û Xurşîd jî bi malê xwe bi xortêñ gund re dixebeitin, xwestina Cemşîd tînin cih, wan didin xwendin û daweta cil xortêñ hêja û miletpewer, digel ku Xurşîd di sergovendê de ye, çêdikin.

Di hezîrana 1941'ê, di hejmara 29'an de jî bi navê "Derketî" adaptationeke Nûredîn Zaza heye. Ev çîroka ku bi bêhnekê tête xwendin û weke helbesteke bedew diherike, li ser derketiyan e.

Derketî; ew kesên ku ji welatêñ xwe derketine, terka welatê xwe kirine, bi çol û çepelan ketine û ji xwe re li dûriyê li starekê geriyan e. Mirov di vê kurteçîrokê de dibîne ku dûrî çiqas xweş be jî, dîsan mal, yanî welat xwestir e. Xwarin, lixwekirin, vexwarin, xweza û stranêñ welêt bi mirov xwestir û şîrîntir in.

Di eynî hejmarê de, yanî di hejmara 29 ya 10'ê hezîrana 1941'ê de çîrokeke wî bi navê "Gulê" heye. Gulê mîrê xwe, yê ku bêî dilê wê ye dikuje, paşê bi qiralê çiyan, Qoçoyê Pola re derdikeve ciyê. Gulê jineke bejinzirav, spehî, şîrîn û mîrxas e. Lê di çavê gun-diyan de jineke qehpik, bênamûs û xerab e. Qoçoyê Pola ku gelek xerabî û rîbirrî kiriye, ji bo ku êdî li hemberî dijminê gelê xwe şer

bike, di hizûra gundiyan de sond dixwe.

Nûredîn Zaza hatina Qoço wilo salix dide:

*“Gundî di mîvanxana Reşo de rûniştibûn û daxiftin. Dijmin ji gund bi tenê qonaxekekê dûr bû, nixta gundê Şadiya di nêzîk de wê biketa axa bav û kalan.*

*Herkes diponijîn û li çarekê digerîyan. Ezman girtî bû, bandevekê ji reşîya şevê re hîn bêtir tîrs dida. Di vê gavê de derî bi şidet vebû; qîralê çiyan, Qoçoyê Pola bi heşt mirovên xwe ve kete hundir. Cilêن wan şîl bûn, av di tîvingêن wan de dihate xwarê. Gundiyan gişan da ber qîran: Poloyê kurd, sergevazê çiyayêن Kurdistânê, fermo”.*

Qoço bi çil gundiyan ve li hemberî dijmin kemînê vedigirin û bi hêrs û rik li hemberî dijmin şer dikan. Gulê radihêje xencerekê û demekê winda dibe. Paşê gava di reşayiya şevê de ji hember tê, gundi û Qoço wilo têdighîjin ku Gulê ew xistine xefka dijmin; loma gundi Qoço hêrs dikan û Qoço jî berê tîvinga xwe bi Gulê vedike û bi hêrs berdidiyê.

*“Berikê wek qîrekê tariya şevê çîrand û armanca xwe a zirav wek çarşeveke hevîşim raxiste erdê”.*

Lê paşê gava zora dijmin dibin û li gund vedigerin, di malekê de tiştekî ecêb dibînin.

*“Serê zabitê dijmin ji laşê wî hatibû birrîn û xencer bi xuîn bû... Di kulma zêbit a guvaşti de gurzek porêن Gulê ên zer pêl didan”.*

Gava qîralê çiyan Qoçoyê Pola vê mîrxasî û binamûsbûna Gulê dibîne û bi rastiyê dihese, rohnî di çavan de namîne, radihêje xencerê û bi bayê bezê derdikeve û nema xuya dile.

Çîroka “Keskесor” jî di derheqa serîhildana Şêx Seîd de ye. Ev çîroka ku bi forma kesê yekemîn hatiye nivîsandin, xuyaye bîranî-

neke Nûredîn Zaza ya zaroktiyê bi xwe ye.

Nûredîn zarok e, diçe dibistana tirkan. Tam di destpêka biharê de ye. Yanî gava êdî zivistan cihê xwe ji biharê re û sarî jî cihê xwe ji germê re dihêle, Nûredîn guhertinekê di mirovan de dibîne, tiştin dibin. “*Gelo ev ci ye, ci dibe?*” Nûredînê xwendevan ji xwe dipirse. Lê paşê ji çûyin û hatina mezinan, ji tevgera wan, ji rabûn û rûniştina wan, ji peyv û gotinên wan têdigihê ku şerek dike dest pê bike; şerê kurdan, serîhildana wan li hemberî dewleta tirkan. Têkoşerên kurd demekê baş li ber xwe didin, xwe ji ber êrifşen dij-min diparêzin û paşê jî dijmin ji bajarê xwe derdixin.

Zaza vê yeka han wiло salix dide:

“*Esker top mitralyozen xwe berdidan û direvîyan. Mezinên bajêr yên ko berê berberî bi hev re dikirin, li hev dihatin û çek didan mirovên xwe*”.

Şerkerên kurd yên ku ji bajêr derketibûn û dabûn ser pişta dij-min, milet bê sebir li bendî vegera wan e. Dû re gava pêjna hatina wan dikan, “*Hatin, nêzîk bûn, kurd hatin*” dibêjin. Ev yeka han zû di nava bajêr de belav dibe, her kes pê dihesin “*Xort û mîr bi çekên xwe ve, hin bi dehol û zirne, hin siwar, hin peya; bi hezaran û bi dengê her bijî kurd! Her bijî Kurdistan! Her bijî serbestî!*” ve pêrgî şervanên xwe têن.

Xuya ye ev azadî û kêfxweşıya milet zêde dom nave. Dijmin bi hemû hêza xwe ve digere ser wan; kêfxweşî û dilşahiya wan li wan dike dûjeh, wan şerpeze dikan. Yanî wê azadiya ku wan ji bo kurtedemekê bi dest xwe xistine, bi hovîtî ji wan distûnîn.

“*Ala rengîn, şan û rûmeta me çîrandîn, avêtîn ber lingên xwe, pêlê kirin û li şûna wê ya xwe, ya xuînxwaran danîn. Ziman û stranên kurdî bend kirin û tirsek dijwar xistin dilê xelkê*”.

Çiroka bi dû vê de ji ya bi navê “*Stêrk*” e. Stêrk çirokek evînî ye, ji “Les Étoiles”, D’alphose Daudet adaptation e. Ez dikarim bêjîm ku ev çirok yek ji çirokên bi kurdî ya herî xweş û bedew e ku min xwendiye û jê hez kiriye. Ev çiroka ku gelekî nêzîkî realîzmê ye, lê di eynî demê de pirr romantîk e, di derheqa şivanekî û keça axê, Mijganê de ye. Di derheqa evîna wan de ye, an ji di derheqa evîna şivên ya nîvplatonîk de ye.

Ew xortê diltenik, dilketiyê Mijganê, li ba bavê wê şivan e. Cihê şivên bi qonaxekê dûrî mala axê ye. Ew di xaniyekî mîna holikekê de dijî û ji panzdeh rojan carekê xwarina wî jê re diçê. Piraniya caran, pîrê, ku ew ji li ba mala axê xizmetkar e, xwarina şivên jê re dibe. Rojekê pîrê ne hazır e û kesekî din ku bikaribe xwarina şivên jê re bibe tuneye, ji ber vê yekê keça axê, Mijganê, digel xwarina şivên ya panzdeh rojan li hespê siwar dibe û berê xwe dide zozên, ba şivên.

“*Mijgan bi bejna xwe ya zirav û narîn, bi çavêن xwe yêن çeleng û bi cilêن xwe ên xemilandî û giran spehitî bi xwe bû. Cîyê wê bajar, xaniyêن delal û îşê wê govend, reqs û stran bû; lê ne çiya, rêl û qantir bûn.*”

Gava şivan bi wî awayî çav li Mijganê dikeve şaş dibe, bi çavêن xwe bawer nake.

“*Mexlüqa çeleng! Çavêن min jê nedibûn. Cara pêşî min ew ji pir nêzik de didit. Niha ew li ber min sekinibû û tenê ji bona çavêن min bû*”.

Lê ew yeka han ji şivên re ne ewçend hêsan bû. Ya ku ew di xewn û xeyalan de lê difikirî, niha li ba wî, zadê wî yê panzdeh rojan jê re anîbû. Ji ber vê yekê ji ew şaş bûbû. Gava ew pê re dipeyivî ji, dilê wî hildavêt, hişê wî diçû û qirika wî dihate girtin.

Ji ber ku baran tê û çem weke lehiyekê radibe, Mijganê nikare li çem bixe, derbasî aliyê din bibe û here malê, loma bi tirs ber bi şivên ve vedigere. Şivan vê mîvana xwe ya ezîz bi dilxweşîyeke bê-hempa qebûl dike, ji bo ziwakirina kincêن wê jê re agirekî dadide, di wê navê de jî jê re xwarinekê û tasek şîr amade dike. Paşê jî jê re ji pûş û ji postê mihê cihekî razanê çêdike.

Ew yeka ku ji bo şivên bi tenê xewn û xeyal bû, niha rastî bi xwe bû. Loma jî wî "*tu caran ezmanek mîna ezmanê wê şevê kûr û stêrk uék yêñ wê şevê geş nedîtibû*".

Keça axayê wî ye, şeveder maye û xwe spartîye wî. Şivanê diltenik ji evîna wê pê ve li tu tiştekî din nafikire. Yanî li gor gotina şivên, "*Li tiştekî xerab nafikire*".

Xuyaye di wê holikê de li ser wî pûşî xewa Mijganê direve, ew radibe ser xwe û derdikeve der.

"*Deriyê holikê vebû û weke hîva çardehşevî keçika delal jê derket*".

Di hejmara 35'an a kovara Hawarê de jî çîrokeke Zaza bi navê "Perîşanî" heye. Perîşanî ya li ser xeyalekê hatiye avakirin, wilo dest pê dike:

"*Li taxa mahciran, ji oda xwe temâsa baxçeyên Şamê dikim. Ji nişkê ve zozanêñ Kurdistanê ên bilind, bi dar û avên cemidî têñ bîra min. Ez xwe li wê derê, li ser kanîkê, li bin daran dibînin.*" Û wilo dom dike, di van xeyalan de kûr diçe, digel xweşî û spehîbû-na Kurdistanê, ew zilma leşkeran, stemkariya wan, perîşanî, belengazî, paşdemayîn û nezaniya kurdan û welatê wan dibîne û di vê rîwîtiya xeyalan de dîsan bi paş de tê Şamê, dikeve oda xwe û li ber pencera xwe xuya dike. Bê herndê xwe keserekê dikişîne û ji xwe re dibêje:

## **“Nezanî...Nezanî...Nezanî...”**

Hevîna Perîxanê jî di hejmara 37'an a Hawarê de weşiyaye. Çîroknivîs vê bûyerê ji destpêka sedsala 19'an distîne. Ev evîn ne evîna ku em pê dizanin, ne evîna xortekî ye. Evîna Perîxanê evîna welêt e, evîna gelê wê ye. Evîna bavê Perîxanê jî evîna gel bû, evîna welêt bû. Lê bavê wê yê girs, çeleng, dewlemend û mîletperwer di ber vê evîna xwe de şehîd dikeve. Şehîdketina bavê Perîxanê gelekî tesîrê lê dike, dilê wê yê tenik perçê dike. Loma ew dixwîne, xwe digihîne, bi dil û can û bi bawerî dide ser riya bavê xwe. Di demeke kurt de gelek mirov li dor xwe diciwîne û dibe serok û şîretkera wan. Lê mixabin, ew jî mîna bavê xwe jî wê evîna pak re dibe gorî, lê ji aliyê din jî li ser riya hîzir û ramana wê kurd cih bi cih rizgar dibin.

*“Nûçeyên serdestriya Kurdistanê dihatin. Xelkê hêstirên şîn û şabiyê dirijandin û giyanê Perîxanê di tava ala rengîn de dicîrisî û ji giyanê bavê xwe re dikenî”.*

Nûredîn Zaza di hemû çîrokên xwe de zimanekî sivik û zelal bi kar anîye. Ez bawer nakim wê tu xwendevan di xwendina van çîrokan de zehmetiyê bikişîne. Digel sivikbûn û zelalbûna zimên, gava mirov temenê wî û dîroka nivîsandina van çîrokan jî dide ber çavan, mirov dibîne ku Zaza xurt û jêhaî bû. Ger di nivîskariya wî de berdewamî hebûya, ew dikarîbû bibûya nivîskarekî dema me yê bijarte. Lê mixabin, ji ber gelek sedemên nas û nenas, mîna piraniya endamên ekola Hawarê wî jî berhemin kêm li dû xwe hiştin. Lê her çawan be, ev kêmberhemên wî jî ji bo rohnîkîrina dîroka kultur, siyaset û edebiyata kurdî, şewqek e. Nemaze, wê di dîroka edebiyata kurdî cihekî van çîrokên wî yê taybetî hebe. Em hêvîdar in me ê bi berhevkirin, amadekirin û çapkirina vê

pirtûkê li hemberî çiroknivîs û zanayê xwe Nûredîn Zaza berpirsiyariya xwe anîbe cih.

Herweha ez dixwazim çend gotinan li ser awayê amadekirina vê pirtûkê bibêjim. Di eslê xwe de ev tiştên ku ez ê bibêjim, ji bo hemû nivîsên di Hawarê de derbas dibe. Di hin çîrokan de ji berdêla "re" û "de", "ra" û "da" hatiye nivîsandin, di hinan de jî, "re" û "de" derbas dibe. Ji berdêla "ku" ya ku îro tête bikaraînin, "ko" derbas dibe, "kiribû" bi "kiri bû" hatiye nivîsandin, "bûbû" bi celebê "bû bû" hatiye nivîsandin. Di şûna "hûn" an jî "hun" a îro de "hon" bi kar aniye. Me jî qet pê nelîst, di Hawarê de bi ci awayî hatibûn nivîsandin, me jî ew bi wî awayî nivîsandin. Herçî ji bo navê pirtûkê ye, me çîroka bi navê "*Keskesor*" minasib dît. Lê bi tenê, serpêhatiya bi navê "*Şerê Mêşan*" ku di sala 1965'an de di *Hêviya Welêt* de hatibû weşandin, cûda ye, mîna standarta îro ye. Me ew jî mîna wê nivîsand. Ji bo ku xwendevan bikaribin bi hêsanî çavekî li orjînala wan bigerînin, me di binê çîrokan de hejmar, meh û sal jî nivîsandine.

Bi hêviya ku wê bi dilê we be...

**Firat Cewerî**

## XURŞİD

Xurşîd dewlementirê gund bû. Xortekî bi bejn û bal, çeleng û giran bû. Rojekê li ber melayê gund rawestiya û gotiyê:

- Kurekî min çêbû; jê re navekî şîrîn ji te dixwazim. Mele hinekî ma, paşê serê xwe rakir û got:
- Bila navê wî Cemşîd be! Wek navê min e û di gund de navekî bi tenê ye, ji xwe min jî ev dixwest.
- Here, bi arîkariya Xwedê kurê te ji bo te û ji bo millet baş be.

Xurşîd, piştî ku spasên xwe ji melê re pêşkêş kîrin, derket û dilgeş çû mal.

\*\*\*

Piştî şanzde salan rojekê Xurşîd dîsa çû cem mela,

wek berê xurt û xweşik bû. Mela jê pirsî:

- Dîsan çi ye, mîrza Xurşîd?

Îsal kurê min Cemşîd xwendina xwe bir serî û di nav hevalên xwe da ê pêşîn derket. Min divê îro jê ra mewlûdekê bidim xwendin. Ez hêvî dikim tu îşev xwe biêşî-nî bêî mala me û bi dengê xwe ê şîrîn vê mewlûdê ji me re bixwînî.

- Cemşîd hêja ye, ezê jê ra mewlûdekê bi kurdî bixwînim.

\* \* \*

Heşt salên din borîn. Xurşîd dîsa rojekê bi çend mirovan ve li pêş mela rawesta. Mela lê nêrî û got:

- Tu her roj xurtir dibî; di rûyê te de nîşanên xortani-yê û jiyinê dixweyin. Ev ji çi ye?

- Bê derd im seyda, çîma pîr bibim?

- Min divê tu her we bî. Lê bêje, dîsa çi ye?

- Min ji kurê xwe re keça camêrekî xwestiye, dewlemend e, pir pere xwest. Lê kurê min yek e û li ber dilê min biha ye. Ji kerema xwe mehra wan bibire.

Mela mehir birî û ew pîroz kirin.

\* \* \*

Piştî çend heftan Xurşîd û Cemşîd li ser keştîke piçûk

di golekê da diçûn bajêr, ji bo kirîna cilên bûk û zavê. Ava golê bê pêl bû, di meha gulanê de bû. Doraliyên golê bi kulfîk û hêşinayiyê xemilandî bûn. Xurşid li kûrê xwe dinêrî û xwe bextiyartirê dinê dizanî. Cemşîd wek di xewnekê de bû. Bi zendên xwe ên xurt, destikê keştiyê zû dilivandin û keştî li ser avê dimeşand. Lê carna xwe ji bîr dikir, eqlê wî diçû cihêن din.

Ji nişkê ve destikeke keştiyê ket avê. Cemşîd zû vegeร ser û destê xwe dirêjî wê kir. Di wê gavê da destê wî ê din jî, ji keştiyê şemitî û xwe ne girt, ket avê.

Lê Cemşîd melevanî ne dizanî. Bi carekê di avê da winda bû. Derket û kir hawar. Bavê wî dest avêtê; lê ne gihayê. Cemşîd li ber çavêن bavê xwe çû bin avê û nema bi ser ket.

Xurşid bi çavêن xwe bawer ne dibû û li benda derketina kurê xwe dima. Lê ji çend piqpiqokê avê pê ve tiştek xuya ne kir.

Xurşid sê roj û sê şevan di wî cihî da ma. Roja sisikan laşê kurê xwe ê nepixî da pişta xwe û bir mal; sibetirê ew veşart.

\* \* \*

Piştî salekê bi şev li deriyê melê da. Derî vebû. Melê li pêş xwe mirovekî dirêj, kal, porsipî û piştxwar dît. Berê ew nas ne kir. Paşê melê kûr nêrî û got:

- Ma tu ne Xurşîd î, vê nîvê şevê te xêr e?
- Belê ez im, hatime tiştekî bi navê kurê xwe Cemşîd bidim te, ji bo xwendina zarokên gund ên belengaz.

Xurşîd rabû kîsek pere danî ser masê.

Mela got:

- Ev pere pir in.
- Belê, îro min nîvê zeviyêñ xwe firotin. Cemşîd dix-west bi destê xwe ji miletê xwe ra qencyîñ mezin bike. Lê Xwedê ne hişt. Niha ez deynê wî didim.

Melê destê wî girt û bi dengekî nerm gotê:

- Cemşîd kurekî baş bû. Xwedê rehma xwe lê bike. Lê dinêrim tu pir li ber dikevî ew tişt li min jî qewimî. Were, emê hejkirina xwe bidin zaroyêñ gund û ji wan xortêñ xwenda, xurt û hêja bînin pê.

Xurşîd li ser gotina melê hinekî pêjinî, piştre serê xwe rakir û li melê nêri. Di çavêñ wî da ronahiyekê dijwar hebû. Xurşîd dilê xwe da bû zaroyêñ gund.

\* \* \*

Xurşîd malê xwe, mela zanîna xwe dabûn milet. Piştî şanzde salan di gund da daweta çil xortêñ hêja, xwenda û miletperwer çêdibû û Xurşîd tê de bi serê sergo-vendê girti bû.

*Hawar, hej. 27, Nisan 1941*

## **DERKETÎ**

*Adaptation de “L'exilé” de Lamenneais*

Terka welatê xwe da û kete dinyayê. Xwedê rêberiya derketiyan bike!

Ez di nav miletan de derbas bûm, li min nêrîn, min li wan nihêrt; lê me hevdû nas ne kirin.

Derketî li her derê bi tenê ye!

Gava roj diçû ava û ji xircikên newalan dû û dûman radibûn; min ji xwe re digot:

“Çiqas bextiyar e ew mirovê ko êvaran vedigere mala xwe û di nav zar û zêçên xwe de rûdine”.

Derketî li her derê bi tenê ye!

Bi kû da diçin ew ewrên ko ba wan dide ber xwe? Ba min jî wek wan dide ber xwe û bê hemdê min, bi kêfa xwe min dajo.

Derketî li her derê bi tenê ye!

Ev dar spehî, ev ku'lîk xweşik in; lê ev ne dar û ku'lîl-kên welatê min in: Tu tiştî nabêjin min.

Derketî li her derê bi tenê ye!

Ev çem bi dilekî şikestî li deştê diherike; lê xurîna wîne wek ya çemê me ye ko min di zarotiya xwe de dibihîst; ev tu tiştî nayine bîra min.

Derketî li her derê bi tenê ye!

Ev stran şîrîn in; lê ahengên wan ên ges û zîz ne wek yênen stranênen welatê min in.

Derketî li her derê bi tenê ye!

Ji min pirsîn; “Çima hergav bi girîn î?” Gava min sebeb gote wan; tu kes bi min re ne girî; ji ber ko derdê min fehim ne kirin.

Derketî li her derê bi tenê ye!

Min kalin dîtin; zaro li wan hêwirîne, mîna zeytûnêñ kevnare ko kelem û derxik li wan hatine hev. Lê tiwan ne gote min, “kurê min!” tu zarokî ne gote min “bavo!”

Derketî li her derê bi tenê ye!

Min di ser kelat û bircan re alin dîtin; lê ne bi reng, ne jî bi pêldana wan, dilê min ges ne bû; ew ne keskesorêñ me bûn.

Derketî li her derê bi tenê ye!

Heval, bav û bira, xweşî, rehetî û serbilindî, bi tenê li welêt hene.

Derketî li her derê bi tenê ye!

\*\*\*

Derketiyê reben! Ev girîn û zarîn bes in! Pir wek te dûr hatine xistin; herkesî wek te windabûna bav, bira û hevalên xwe dîtiye. Hêviya xwe vejîne û xwe ragire; tu jî rojekê bigehî miraz û armanca xwe, heke îro ne be jî... sibe!

*Hawar, hej. 29, Hizêran 1941*

## GULÊ

Gundi di mîvanxana Reşo de rûniştî bûn û daxaftin. Dijmin ji gund bi tenê qonaxekê dûr bû, nixta gundê şadiyan di nêzîk de wê biketa axa bav û kalan.

Herkes diponijî û li çarekê digeriya.

Ezman girtî bû; bandevekê ji reşıya şevê re hîn bêtir tirs dida. Di vê gavê de derî bi şidet vebû; qiralê çiyan, Qoçoyê pola, bi heşt mirovên xwe ve ket hundir. Cilêñ wan şil bûn; av di tivingên wan re dihate xwar. Gundîyan gişan dan ber qîran: “Polayê kurd, sergevazê çiya-yêñ Kurdistanê fermo!”

Lê Qoço rûnenişt, di nîvê odê da ma û wek serdarekî bi dengekî xurt û gur gote wan: “Gundiño! ev panzde sal in ko ez gunehan dikim. Xelkê dikujim. Xerabiyê dikim. Stranêñ min di van rîlêñ rojnedîtî de hatin gotin, lê ji dihî vir da ji devê ti kesî dernakevin. Belkî ji bo me hemiyan, ev şev, li ser axa welêt şeva me a dawiyê

be. Ji bo avêtina gunehêن xwe ji ser xwe min sond xwariye ko dijmin ji welêt derêxim”.

Sorahiya rivîna agirê êzingan di tifikê de li dîwaran dihejiyan. Pola li dora xwe dinêrî. Çavêن wî diçirisin. Çil gundi tevde rabûn û gotin: “ Em jî sond dixwin, em jî bi te re ne, pilingê kurd!”

Di wê gavê de, jî nişkê ve derî vebû, jinikeke zirav, narîn û şîrîn, wek pelekî dara bişengê li ber bayî, ket hundir û got:

“Ez jî bi te re me, ez jî mîrê Pola!”

Gundiyan gişan bi dengekî weke ken kir qîr:

“Gula qehpik! Gula bê namûs!”

\* \* \*

Gulê ji gundi bû. Berî çend salan bavê wê bi zor ew da bû yekî. Gulê rojekê mîrê xwe kuştı bû, keti bû pê Qoço û li serê çiyan pê re digeriya. Gundiyan bi çavekî ne baş lê dinêrîn, her gav jê re dijûn dikirin û deriyên xwe her gav lê digirtin. Ji tirsa Qoço ne bûya belkî ew dikuştin. Lî, ne tehqîra gundiyan, ne jî tajanga Qoço ji Gulê re ev rê ne dida berdan. Gava Qoço ew dida ber tajanga, Gulê digot: “Li min xe pilingê min! Li min xe! heya destê te biweste! Tu jîna min ï! Ez goriya te me. Bê te ez nabim!”

Di çiyan de bi Qoço re ger, di şikeftan de raketin, di

berfê de qufulîn, jê re bextiyariyeke mezin bû.

\* \* \*

Wê şevê Gulê dîsa digirî, lê îcar ne ji êşa tajangiya Qoço ve ko wek marekî xwe li bejna wê a zirav dipêçand. Xew, qet ne diket çavên wê. Dijmin dê biketa welêt... Rojêن geşî ji bo wan ne diman. Her tişt dibû xeyal. Dengê topêن dijmin gelek nîzîk dihatin bihîsttin... Çiyayêن Qoço ên serbest diketin destê dijmin... Jina gund a pîs li ser vî halî bi girîn difikirîn. Li çara xelas bûnê digeriya. Divî bû ko gundê xwe, welatê xwe, çiyayê xwe û serbestiya pilingê xwe "Pola" ji dijmin biparêze. Ji nişkê ve rabû. Tiştek hati bû bîra wê. Xencereke bi şiv girt. Ji şikeftê derket. Riya aliyê dijmin girt û winda bû.

\* \* \*

Qoço, bi cil gundiyyêن xort û mîrxas ve li pêş dijmin kemîn girti bûn. Hingûra şevê bû. Li ser çiyayê bilind, nîvreş heyveke sor bi dilekî şikestî hêdî, hêdî hildihat. Dengê topan hati bû birîn. Pola çavên xwe li ser çiyayêن xwe; li ser warêن xwe gerand û bi keser li wan nêrî:

Wî sond xwari bû; gunehêن xwe yên pazde salan wê

bi destê xwe rakirina, ne hiştâ ko dijmin derbasî tixû-bên welêt bibe...

Di dilê wî ê pola de agirê serbestiyê pêketi bû. Wî tu caran wek wê şevê hej kuştin û helanîna tola xwe ne kiri bû.

Demekê, Gulê hat bîra wî. Wî hej vê jinikê dikir. Li dora xwe nêrî; li Gula xwe ya ko wek sihekê jê ne dibû ne dît.

Di wê gavê de nêrevanekî wan got: “Bala xwe bidin! ji aliyê dijmin yek tê.”

Siha ko xweya dikir bê tirs û telaş dihat. Dengekî şî-kênen wan rakirin: “Ev Gula qehpik e!”

Gundiyekî din got: “Qehpikê em xistine xefkê! Tîfin-gê berdê, Pola! Ew rêberiya dijmin dike!”

Qoço rûyê xwe tirş kiri bû; birihêن wî lê gjigijîn, kûr li pêş xwe dinêrî. Wî jî gotinêن gundiyan rast didîtin.

Gulê li cem dijmin ci dikir? Ne xwe cihê wan şanî dijmin kiri bû... qehpitî kiri bû.

Qoço di bin ronahiya heyva sor re tifinga xwe dirêjî Gulê kir û got:

- Ha ji te re, Gulê! Berî dijmin berika pêşîn para te be...

Berikê wek qîrekê tariya şevê çirand û armanca xwe a zirav wek çarşeveke hevrîsim raxiste erdê.

Piştre Qoço rabû ser xwe û ji gundiyan re got:

- Zû bin hevalino! Em ê nixta dijmin bigirin!

Çûn. Lê dijmin bê liberxwedan revîn. Kurd ketin asê-gehê; her der vala bû. Bi tenê di odekê de tiştekî ecêb dîtin. Serê zabitê dijmin ji laşê wî hati bû birîn û mezel bi xwîn bû. Li ser nivînê xencereke bi xwîn diçirisî.

\* \* \*

Qoço xencer rakir; wî ev xencer dabû Gulê? Di kulma zêbit a guvaştî de gurzek porêن Gulê ên zer pêl dida.

Qoço kulmikên xwe gez kirin û wî pilingê ko çiya di-hejandin ji bo cara pêşîn girî û gote gundiyan:

- We bi min gunehê paşîn da kirin, ji Gula qehpik re me qehpetî kir!

Bi dengekî têrêş, têrpoşmanî û têrbirîn gotina xwe a paşîn kir:

- Gulê! Te deynê xwe da, te gunehêن xwe rakirin! Ni-ho dora min e, Gulê! Gula min a zer!

Bi xecera xwîndar wek bayekî ji odê derket, berê xwe da dijmin û nema xweya kir.

*Hawar, hej. 29, Hezîran 1941*

## KESKESOR



Di sala 1925'an de bû. Wê salê, ez hîn nû diçûm dibistanê, lê dibistana tirkân.

Di meha Sibatê, Sibata dînoka welatê jorîn de, di gerek cihan de, berf wek dêliya bûkekê ji rûyê erdê hildihat û geşîya hêşinahiyê û kulîkên biharê bi tevî tazehîya wan pêş me dikir. Goya zivistan jî bi hatina tiştekî hêja hesiya bû û zû xwe da bû paş û şûna sermê, berf û bagerê da bû şîrgermiya tava biharê.

Di van rojan de bû ko li bajêr tevliheviyek hebû: Di malan de mezin ji ker ve diştexilîn û bi kêf û bi ken bûn. Jin bi tirs û telaş bûn û bi zarokan re pir mijûl ne dibûn. Esker bi zor diketin xaniyêن Kurdish û mitral-yoz datanîn serê banan.

Li dibistanê, şagirtêن mezin digihan hev û pir tiş di-gotin: “Şer... kurd... tirk... standin...” Me piçûk, me dida pey wan û bêî ko bîr bînin bi van nûçeyan kêfx-

weş dibûn. Lehîstik û ders bê rexbet bû bûn. Pirsên: “Şer... top... kuştin... hatin” em serxweş dikirin.

Mamosteyêñ ko gişt tirk bûn bê zar xuya dikirin; di dersxanê de gêj dibûn û bê hemd dipeyivîn. Îdî stranêñ tirkî ne dihatin gotin û ala tîrkan ne dihate çikandin ser dibistanê.

Tîrs û tevger roj bi roj meztir dibû: Memûr xwe tavêtin mala mezinêñ kurd û bext ji wan dixwestin.

Esker top û mitralyozen xwe berdidan û direviyan. Mezinêñ bajêr yên ko berê berberî bi hev re dikirin li hev dihatin û çek didan mirovêñ xwe.

Dibistan hati bûn girtin û mamostan xwe veşarti bûn. Zaroyêñ deh, panzdesalî xencer û şeşderb hildigirtin. Pirsa “têñ” ji her devî derdiket; her kes bê sebir bû:

Rojekê: “Hatin... nêzik bûn... kurd hatin...” digotin. Xort û mîr bi çekêñ xwe ve, bi dehol û zirne hin siwar, hin peya bi hezaran û bi dengêñ her bijî kurd... Her bijî Kurdistan... Her bijî serbestî..., ji bajêr derketin û çûn pêşıya leşkerêñ kurd yê ko li her derê dida pey t... û ji dûr ve tîrs dixistin dilê wan. Jin û zaro derketi bûn ser banan; hinan stranêñ şer digot, hinan go-vend digirt. Zaroyan debançe berdidan û hesp dibezan-din. Her kes ji kêfxweşiyê mest û geş bû bû.

Behsa rojeke nû û jîneke geş dikirin. Piştî demekê si-war bi kum û destmal, bi şal û şapik wek birûskan ke-

tin bajêr û rast çûn seraya hikûmeta t...

Li serayê tiştekî rengîn xuya kir. Wê rojê hinek baran hati bû; di pişt re bi derketina rojê keskesor bi ezmanan keti bûn. Me got qey yek ji wan danî bû serayê.

Xelk li dora serayê kom dibûn. Em zaro jî çûn. Ew tişte rengîn di ser serê me de sekînî bû. Lê ew ne keskesora ezmên bû. Ez bê sebir bûm... li bavê xwe geriyam. Leşker rêz girti bûn, stranek digotin, çavên wan ên tûj têrken bûn. Min ew li ser hespê dît, ez çûm cem; wî ez danîm ber xwe. Min jê pirsî:

- Bavo ev çi keskesor e li ser serayê?

- Ev ala me ye; kurê min! Ev şan û şerefa miletê kurd e!

- Berê yeke sor hebû, ew çi bû bavo?

- Ew ya neyaran bû. Neyar bi zor keti bûn welatê me. Em kurd iro wan jî erdê xwe derdixînin û dîbin xwedîyê wî. Ha ji te re aleke piçûk! Wê deyne ser dilê xwe! Hejî wê bike û ji bo serfiraziya wê bixebite!

Ez bi gotinêن bavê xwe bû bûm sermest. Dilê min hil-davêt. Bavê min ez maç kirim û ez danîm erdê.

\* \* \*

Heya ko ew keskesor li sera û kelata bajêr pêl dida dinê bi me re tim Bihar bû, bihuşteke rastîn. Lê Bihara me zû wergeriya. Paîzeke reş û bihuşta me bû dojeheke

dijwar.

Piştî çend mehan rewşa bajêr guhêrî. Tîrseke mezin ket şûna geşî û rehetiyê. Ji bêbextiya kurdan û ji ber ko hinekên wan ji nezaniyê arîkariya dijmin kiri bûn, kurd dişikestin. Mirovêñ xwenda behsa bêbextî û bê-rûmetiya hin kurdan dikirin. Ev hal pir dom ne kir! Rojekê dijminan dora bajêr girt û bi topan li me xist û gotin teslîm bin. Lê herçend, mîrên çekhilgir ne ma bin jî; jin, zaro, pîr û nexweş ketin pêşıya dijmin. Hîn xweş tête bîra min: wê rojê şerekî no û xwîndar çêbû. Kurdan arîkariya dijmin dikir. Gelek ne ajot dijmin weke gurêñ birçî ketin bajêr... Hin di cî de kuştin, zaro û ji-nêñ avis dan ber sûngiyan, kal bi dar ve kirin. Hinêñ din jî xwe bi zar û zêçêñ xwe ve avêtin cihêñ nenas û nependî.

Ala rengîn, şan û rûmeta me, çirandin, avêtin ber lingêñ xwe, pê lê kirin û li şûna wê ya xwe, ya xwînxwaran danîn. Ziman û stranêñ kurdî bend kirin û tirseke dijwar xistin dilê xelkê.

\* \* \*

Ev şanzdeh sal in ko ev hal di Kurdistanê de hikim-ferma ye. Û dîsa şanzdeh sal in ko ala rengîn di dilê min û di dilê hezar xortêñ kurd de pêl dide.

Ji bo anîncîha wesiyeta bav û kalan, vekirina tola

wan û daçikandina ala xwe ser kelat û çiyayên Kurdistanê em kurd li benda Bihara xwe ne; li benda baraneke bi keskesor...

*Hawar, hej. 30, Tirmeh 1941*

## STÊRK

*Adaptation de “Les Étoiles” D’alphonse Daudet*

Gava li zozanê Sîpanê Xelatê min pezê xwe diçêrandin, carinan heftein diborîn bêî ko ez dengê tu însanan bibihîsim. Ez bi tenê bi hevaltiya kûçik û pezê xwe bûm. Lê her serê panzde rojan carekê gava ji dûr ve min dengê zingilên qantirê me dibihîst ji kêfa xwe serê xwe radikir; gundiyek, yan kebaniya mala axê ji min re zadê min ê panzderojî tanî.

Wê rojê, ez çiqa şa dibûm; min ji wan nûçeyên gund dixwastin, ji tiştê ko ez ji her tiştî bêtir dilxweş dikirim pirskirina halê Mijganê, Mijgana keça axê bû.

Bê ehemiyet min ji wan dipirsî: gelo xanima piçûk pir diçe dawet û şahînetan yan ne? Qet dikeve govenda? Cilên spehî li xwe dike? Eger ji min re bigotana: “Ma ji te re çi? Şivanê reben û belengaz!” Min ê li wan vege-randa ko ez gihame bîst salî û min hîn di spehîtiya wê de tu kes ne dîne!

Rojeke ïnê ez li benda zadê xwe bûm; berî nîvro baraneke xurt hat: heta piştî nîvro çavêن min li rê bû. Pişt re min hêviya xwe birî û ji sermê ketim holika xwe. Es-rê, min dengê zengil bihîst; zûka derketim derive; ci bînim...? Bizanin kî?... Mijgan! Xanima min bi xwe bû...

Li ber holikê peya bû. Ji bayê ciyê hinarîkên wê bû-bûn sorgul. Li min vegeriya û got; “Gundî mijûl bûn: pîrê jî çû bû cem zaroyêن xwe bavê min ez şandim...”

Mijgan, bi bejna xwe a zirav û narîn, bi çavêن xwe ên çeleng û bi cilêن xwe ên xemilandî û giran spehîtî bi xwe bû. Ciye wê bajar, xaniyê delal, û işê wê govend, reqs û stran bû, lê ne çiya, zozan, rêl û qantir bû.

Mehlûqa çeleng! Çavêن min jê ne dibûn. Cara pêşî min ew ji pir nêzîk didît. Niha ew li ber min sekînî bû û bi tenê ji bona çavêن min bû.

Dilê min hildavêt, hişê min diçû û qirika min dihat girtin.

Mijgan zad ji selikê derxsit û da min. Pişt re bi nêrî-nênen piçûk li dora xwe nêrî da ko ji giha şil nebe hinek fistanê xwe rakir û çû holika min; min da pey wê. Li hundur, li cê raketina min, li bilûr, kulav û darê min nêrî, pişt re bi dengekî zîz û ahengdar gote min: “Tu li vir dijî ne? Şivanê reben! Niha tu bi tena xwe ji dilten-giyê çiqas bêzar dibî? Bêje min: tu ci dikî? Bi ci mijûl dibî û kî tînî bîra xwe?...”

Min ê jê re bigota, “bi tenê te xanima qeşeng”. Dilê min derew ne dikir; lê zimanê min ne geriya û ez sor bûm.

Mijgan bi eza min hesiya û xwest hîn bêtir min biêşîne, “hevala te a delal çîma carna nayê çiyê û te nabîne?” Mijganê, gava ew pirs digotin serê xwe dikir paş û dikenî; min digot qey periya spehîtiyê bi xwe ye!

Lê hatina wê weke xewnekê bû. Piştî demekê gote min! “Bi xatirê te şivano!”

Bi dilekî şikestî min jî gotê: “Xwedê bi te re be, xanim!” Pişt re selikên xwe yên vala avêtin ser qantira xwe, lê siwar bû û bi rê ket.

Wisa dihat min ko her kuçê ko ji bin lingên qantir difirin yek bi yek li dilê min diketin. Çavêن min jî re ne dibûn û wek serxweşekî li ciyê xwe dinihêrtin. Êvarê, gava pez, vedigeriya gomê min ji kaş dengekbihist. Gava min serê xwe rakîr, min xanima xwe dîsa li ber xwe dît. Lê niha wek sibehê delalî û çelengî ne dikir, lê ji tirsa dilerizî û ji sermê diranêñ wê dirikrikîn. Welê dixuya ko ji barana sibê çem rabûbû, Mijgan xwesti bû jê derbas be, avê bor ne da bû. Cilêñ wê şîl bûn û çavêñ wê hêstir dikirin.

Hingûra şevê bû, êdî nikarî bû vegere.

Min xwest dilê wê rehet bikim. Min gotê: “Çi xem e? Xanîm şevêñ tîrmehê xurt in, tu sebebêñ tîrsê nîn in, çavêñ xwe bigirî û vekî, sibe ye!” Paşê, zû min agirekî

mezin dada. Mijgan sol û cilên xwe ziwa kirin. Pişt re min jê re piyanek şîr, hinek penêr, nan û fêkî anîn. Lê eqlê wê ne li xwarinê bû, li hal û mala xwe digirî, bê hemdê min, çavêن min jî hêşir kirin.

Bû şev. Min ji xanima xwe re di holikê de ji pûşan û ji postê berxikekî paqîj nivînek çêkir. Xanima min çû nav ciyan û ez li ber derî rûniştîm.

Ji hevîna wê, dilê min diperitî û laşê min dişewitî. Lê Xwedê dizane, tu tiştê xerab ne dihat bîra min. Çawan bihata? Keça axê min xwe sparti bû min û li bin paras-tina min bû! Welê dihat min ko Mijgan di nav keriyê min de û di keriyê dinê gişt de miyeke tekane ye!

Min tu caran ezman wek wê şevê kûr, û stêr wek wê şevê ges nedîti bûn. Di canê min de, çavêن min de her tişt guherî bûn. Çavêن min bi nêrînêň şaş li tiştan dinê-rîn û aqlê min di ezmanêن xeyalan de ajnî dikir.

Di wê gavê de deriyê holikê vebû û wek heyva çarde-şevî keçika delal jê derket. Ji mayina xwe; û ji ber nivî-nê ji pûş û pelaş xew lê çû bû, hat û li ber agir rûniştî. Min kulavê xwe ji xwe kir û danî ser milê wê, agir vê-jand û bêdeng li cem wê rûniştîm.

\*\*\*



Şev xwes û hinek hênik bû. Di dora me de cîhanêke veşartî bêdeng şiyar dibû.

Di her tiştî de ez bi livînekê dihesiyam; giya mezin dibûn, kulîlk vedibûn, mîwe digihan... Dilê wan jî wek yê min hildavêt û xwîna wan jî wek ya min dibeziya... Stêr bi xwe radibûn û rûdiniştin.

Ji tevgera her tiştî û ji her dengî, Mijgan ji tirsan dilerizî û xwe li min dipêçand. Ji nişkê ve di ser serê me re ronyeke geş borî. Me serê xwe rakir; stêrekê reşıya şevê çirand û li dûrî me ket erdê.

Mijgan bi tirs pirsî: "Ev ci ye?" min lê vegerand: "Ew giyanek e, dikeve bihuştê".

Paşê min şehadeta xwe anî. Wê jî, şas şas li min nihêrî û wek min kir û pirsî: "Hûn şivan sihêrbaz in?" Min gotê: "No xanimê! Lê em li serê çiyan nêzîkî stêran in, ji lewra em ji xelkê bajaran bêtir bi hal û sirêwan dizanin". Mijgan serê xwe danî bû ser destekî xwe û li stêran dinêrî. Gava min li rûyê wê nêrî, min got qey şivana stêran e, ketiye erdê. Bi dengekî heyran gote min: "Stêr çiqa pir in, çiqa spehî ne!" Min ew tu caran hewqas zehf û hewqas çeleng ne dîti bûn! Tu bi navê wan dizanî şivano?

Çawan nizanim, xanima min! Binêr! Di ser serê me re: komika sêwiyan e, ji rojhelatî hiltê û ber bi rojavayî diçe. Hinek li bakur, termê mixêl e heft in li rastê wan, dûpişke, hergav li bakur e. Li ber me ye, kakeşin e. Hinek li çep; kerwankuj e; wek stêrka sibehê ye. Ji lewre kerwanek pê xapiya ketiye rê, û bi şev ji sermê qufulî

ye. Hinek li nîvro Lêl e; dibêjin ko Lêl û Mejnûn hejî hevdû dikirin lê ne digihan hev; gava mirine giyanê wan derketine ezmên, yek çûye rojava, yek jî rojhilat. Li zivistanê Mejnûn li zozanan e, û Lêl li germiyan e. Havînê Lêl tê zozanan û Mejnûn diçe germiyanan û gava ji cem hev derbas dibil digihêن hev, hevdû maçî dikan û pişt re her yek diçe aliye xwe.

Di vê gavê de tiştekî nerm, sivik û germ ket ser milê min. Ev serê Mijgan bû. Çirokên min ew lorandi bûn û bê hemdê xwe ew aveti bû xeweke giran. Min qet xwe ne livand. Stêr pir diçirisîn. Wisan dihat min ko, cot, cotê min pîroz dikan, û bi ken dîsa vedigerin jor. Bi êş û keser min li Mijgan dinêrî, lê tu xerabî û pîsîtî ne dihatin bîra min. Bi tenê bextiyar bûm. Min digot qey çelengtir, spehîtitir û xweşiktira stêran dahatiye, xwe daye milê min û li wê vezeliyaye.

Heta derketina rojê Mijgan ez serimest hiştim. Pişt re rabû, û bi dîtina rojê weke gulekê vebû û kenî. Li goman, berx dikalin, li ser zinarêñ bilind kewan dixwendin, li ser xunava giyayêñ kesk û teze tîrîjêñ rojeke sor diçirisîn, û ji fikra ko ez ê bextiyara xwe winda bikin, dilê min ê reben digevizî û bi nalînêñ kûr û bi keser li wan, li pez, kew û çiyan vedigeriya.

## **PERİŞANI**

Li taxa Mihaciran, ji oda xwe temaşa bexçeyêن Şamê dikim. Ji nişkê ve zozanên Kurdistanê ên bilind, bi dar û avên cemidî têñ bîra min. Ez xwe li wê derê, li ser kânîkê, li bin daran dibînim. Doraliyêñ min giş hêşinayî ne. Ji bêhnêñ xweş pozê min vedibe û sînga min hildibe. Ji nêzîk, weke nalînê, dengê bilûrekê têt, serê xwe radikim: şivanek pezê xwe tîne avê. Çiqas bi kîf im, çiqas bextiyar im, bihuşt! Bihuşteke rastîn.

Şivan li bilûra xwe hin bêtir bi keser dixe; laşê min giş dilerize, xwe ji bîr dikim.

Gava çavêñ xwe vedikim, li ber xwe du jendermeyêñ romî dibînim. Çavêñ wan sor in û ji rûyê wan lanet dibare, yek ji wan, tivinga xwe ji milê xwe radike, bi dengekî hişk û bi zimanê xwe, ji şivan re dibêje: “Bes bizire, ka ji me re berxekî bîne.”

Şivan fehim nake; şaş û bi tirs li wan dinêre. Jendermeyê din dikeve nav pêz û li berxekî qelew digere. Si-

van razî nabe, lê bi zimanê wan nizane. Bi destê xwe îşaretan dide û dibêje: "Meke! Berde! Berde!" Jendermeyê din tivinga xwe hildide, dirêjî şivan dike: "Bilûr qey ne bes bû, tu bi kurdmancî jî dibêjî" û berdidê. Şivan bêdeng dikeve erdê û pez belav dibin. Xwînxwaran bihuşt kirine dojeheke dijwar.

Bi girîn van deran berdidim û têm Cizîrê. Wexta paleiyê ye. Her der zer, zer e. Li zeviyan, ji dûr ve wek heywanan, tiştên bi can, li ser çar lingan dilivin. Nêzîkî wan dibim, bi qelefeta bedewiyan însanan dibînim, lê bi kurdî dipeyivin; laşê wan ê tazî û spî nerm û xweşik li ber tava Cizîrê şewitî û reş bûye. Pîreka, zaroyêن xwe ên berşîr avêtine erdê, nav toz û axê. Mêşan rûyê wan girtiye. Ji cilên wan ên genî bîhnêن pîs têن.

Zaroyêن deh donzdeh salî alîkariya wan dikin. Nîvtazî ne, pêxwas û serqot in. Ji tavê, çavêن wan bi zor vedibin. Bê mekteb û xwendin in!

Li dora xwe dinêrin: darek nîn e. Lê xaniyêن wek koxên mirîşkan, dibînim.

Diçim rex wan. Ji derî ve serê xwe xwar dikim, diçim hundur. Alîkî mezeleke tarî, bê pencere û nizim; li qunçikekê nexweşek dinale, li aliyekî jî kerek dizire. Bîna min teng dibe. Zû xwe tavêjîm derve. Ev e hal û jiyana wan. Çandina wan ci ye? Çend elb genim û ceh. Bêtirî wan jî cotê axan, an xwedî erdêن biyanî dikin. Piraniya wan, ji niha de malê xwe bê qîmet firotiye. Ji ber ko bi-

rçî û tazî ne, belkî jî deyindar in. Ên mayî, li pehîzê, ji destê ticarêن bêwijdan, wê çi bikşînin.

Zilma memûr û jenderman jî li ser e. Şêx jî hene: Piştî paleyî û rakirina bênderan deynê şêxan dimîne. Roja cejnê ye. Ez van gundiyên reben, belengaz, cahil, bê mirşîdên rastîn û xwedî wijdan, li cem şêxê wan dibînim. Cilêن wan peritî ne, hin pêxwas in, û ji dûr hatine.

Tên, ji dûr ve destqifili, serxwar, li ber şêx disekinin, paşê bi dor diçin sejdeya wekîlê Xwedê, wekîlê pêxember û dergevanê bihuştê. Lingên wî, destên wî maçı di-kin, tiştekî didin ê û bi fehît, bi tirs û telaş li ser çongan, pêlepaş dimeşin û derdikevin.

Dinê û bihuşt tev de kar kirine. Niho ew ê herin mal, û çend mehan, di koxikên xwe de, nanê tisî û savar bixwin û ji dinê bêxeber li benda biharê bin. Bextiyar in!

Vedigerim Şamê, ez serê xwe ji pencerê derdixim, ji qesrên delal dengê radyowan û perwaneyên elektrîkî tên. Li ser cadeyên pak tramway dimeşin. Li ezmên balafrek digere. Bê hemdê xwe keseran dikşînim û ji xwe re dibêjim: nezanî... nezanî... nezanî... perişanî.

*Hawar, hej. 35 Tîrmeh 1941*

## **HEVÎNA PERÎXANÊ**

Rojeke pehîza 1907an bû. Perîxan û Eyşe di bexçê de dileyistin. Perîxan donzde û Eyşe jî sêzde salî bû.

Wek hergav, lîstika wan dîsa şer bû: Perîxan bû bû eskerê kurd û Eyşe jî eskerekî romî. Berê, ji dûr ve bi keviran dan hev; pişt re nêzîk bûn û bi daran, bi silan û bi kulgikan ketin hev.

Perîxan di van tiştan de xwe zû ji bîr kir, wek pilinge-ke birîndar xwe tavêt ser dijminê xwe û pir dom ne dikir ew dida ber xwe.

Eyşe jî xwe li ber Perîxanê pir ranegirt; xwe spart wê û bext jê xwest. Lê Perîxanê dilê xwe zû bi zû hênik ne dikir: di wê de ji navê “romî” û ji romiyan re kîneke venekuştî, kûr û bê payan hebû. Bi darê xwe li kumê Eyşê ê hesin dixist û digotê: “Romiyên genî! hon bi bê-bextî me dikujin! heqê me distînin! lê di şerî de dawiya we bi kurdan re ev e! her bijî kurd! her bijî Kurdistan! Qêrîn, zarîn û hêviyên Eyşê Perîxan sist ne dikir.

Di vê gavê de, ji aliyê malê merivekî xuya kir. Nêzîk bû; ew apê Perîxanê bû. Bêhal dimeşıya; di çavên wî ên sor de şopêن hêstirêن ziwa xuya dikirin. Hat, destê Perîxanê girt û bi dengekî têrêş gotê: “Bes e Perîxan! Bes e! te hevala xwe kuşt!” Perîxanê bi erîn û xeyd li Eyşê nêrî û lê vegerand: “Heqê romiyan û yê dostêñ wan ev e! Bila Eyşe romî nebe! Nizanim emê rojekê tola xwe vekin!... Emê wan ji erdê xwe derêxin!... derêxin!...”

Pişt re destê xwe da apê xwe û meşîyan. Piştî demekê Perîxanê hat ser hişê xwe; serê xwe rakir û li apê xwe nêrî: halê wî ê pêrîşan endişeyeke mezin xist dilê wê. Çima apê wê bêhal bû?... Çima wek hergav ne dikenî û ne dipeyivî?... Bavê wê ê biha li ber dilê wê hate bîra wê... Perîxanê baş dizanî jîna bavê wê hergav di xeterê de bû. Hezar tişt hatin bîra Perîxanê û telaşeyeke mezin danê. Dilê wê ê piçûk pir hildavêt û laşê wê ê zirav û narîn dilerizî... Dixwest zû bigehe mal... zû...

Ezman reş bû. Bayekî pehîzê î pîs pelên daran ên cil-misî û zer dibarandin ser serê Perîxanê û apê wê. Ev pel wek laşen miriyan diketin erdê û ew dinixumandin. Perîxanêbihintengî dikir... Mal jê re dûr... pir dûr xuya dikir; dimeşîyan... dimeşîyan lê ne digihanê...

Dawiyê hatin. Ketin hundir; xelkê malê di lîwanê de bûn û digirîn. Perîxan di nîvê odê de ma û li dora xwe nêrî: ciyê bavê wê vala bû... Ruyê wê bû zer. Bîstekê xwe winda kir; lê zû xwe ragirt û çavên xwe vekirin:

diya wê reşa xwe girêda bû; rûniştî, digirî; serê xwe rakir; keça xwe dît, milên xwe jê re vekirin: Perîxan weke çûkekî birîndar kete hemêza diya xwe û bi girîn gotê: "Dayê! Dayê! Kanî bavo? Ka bavê min ê delal? Kuştine! ne?..."

\* \* \*



Bavê Perîxanê, Mûsa begê kêsanî, merivekî gir, çeleng, dewlemend û miletperwerekî hêja bû. Wî ji piçûkayiyê da hejî miletê xwe ê dîl, hergav bindest lê mîr û qehreman dikir û ji bo serbest û serbilind bûna wî dixebitî. Mûsa beg civateke veşartî digerand. Armanca wî ev bû: "Yan serxwebûn yan mirin!" Tu kurên Mûsa begî nîn bûn. Bi tenê Perîxana wî hebû. Mûsa beg keça xwe wekî kurekî bi xwedî dikir û her tişt hînî wê diki-rin.

Êvaran ew rûdinand ber xwe û bi saetan ve wek hevalekî pê re dipeyivî. Carina ew dikir himbêza xwe, destê xwe di ser porê wê ê reş de digerand û li çavên wê ên kesk û bijangres dinêrî û digotê: "Perîxanê! ev çi çav in, Perîxan? Ev ne wek çavên xelkê ne! Çavên te pir kûr, dûr û tûj dinêrin. Ev ji min re pir tiştan dibêjin. Ez di van de qedera Kurdistanê, cihanîna hêviyên xwe dibînim, min bê guman nekî, Perîxan!" Perîxanê milên xwe ên zirav li stoyê bavê xwe digerand, ew maç dikir

û çavêن wê hêstir dikirin.

Perîxanê ji niho de bavê xwe hêvîdar dikir: Memozîna Ehmedê Xanî ji ber kiri bû. Xerîta Kurdistana mezin, tevî bajêr û gundêن wê wek resamekî ji ber çêdikir û dîwarêن odayêن malê bi wan dixemilandin, ji dîroka kurdan pir tişt dizanîn û dilgirtiya mîraniya wan dibû.

Mûsa beg ji keça xwe razî bû. Perîxan wê rojekê bi kîrî miletbihata...

\* \* \*

Wê rojê, gava, Perîxan di bexçê de dileyist, bavê wê bi hevalên xwe ve civînek danî bû. Bi bêbextiya yekî eskerêن romî dora çiyê girti bûn û keti bûn hundir. Ew yek bi yek derêexistin, birin qışlê û ew dan ber tifingan.

Gotinê Mûsa beg ên dawîn ew bû bûn: “Her bijî serbestî! her bijî kurd! her bijî Kurdistan!”. Mûsa beg piştî ko ev gotin kiri bûn, keti bû erdê û di xwîna xwe de vegevizî bû...

\* \* \*

Diya Perîxanê mesele giş got ê. Perîxan dilgirtiya bavê xwe bû; hinekî girî. Lê gotinêن bavê wê hatin bîra wê: “yan serxwebûn! yan mirin! Perîxan! min bê gu-man nekî!” Belê! Bavê wê di riyeke miqedes de hati bû

kuştin; qurbana armanca xwe bû bû. Rabû, çavêن xwe ziwa kirin û ji diya xwe re got: "Dayê! bavê min dij-warbûna riya xwe dizanî; wî ev tişt giş da bûn ber çavêن xwe. Lê wisa diviya bû. Ez riya wî digirim. Divêt ez tola wî û tola welêt rakim!... rakim!... Ev jî ne bi girî, lê bi xebatê dibe..."

Perîxan ji lîwanê derket û ket kitêbxana bavê xwe.

\* \* \*

Şeş sal borîn. Perîxanê dibistana xwe xelas kiri bû û bû bû dîlbereke bejinzirav, hinarîksor, narîn û awirpling. Weke hemî keçen nivşê xwe, Perîxan jî dilketî bû.

Lê hevîna Perîxanê ne weke hevîna herkesî hevîneke adî bû. Perîxan dilketiya armanca bavê xwe, dilketiya serbestiya miletê xwe, dilketiya serxwebûna welatê xwe bû.

Perîxan, niho, ji heyeta civata bavê xwe a kevin bû. Bi jîrî, xebat, ixlas û agirê wê, civat li her derên Kurdistanê ji xwe re lebatêن hêja peyda kiri bûn. Perîxan bê etlahî dixebitî û xwe ji bo rojeke minasib hazir dikir. Ew roj hat.

\* \* \*

Rojeke cejna romiyan bû. Esker li meydaneke mezin

hati bûn rêz kirin. Serdarê esker û hakimê Kurdistanê bi zabitên xwe li ciyekî bilind, di bin çadirekî de rûnişti bûn û temaşa esker û xelkê dikirin.

Kurd berê vî bi rojekê xwe li her derê Kurdistanê pêk anî bûn: Bi tenê ji wan re canbêzarek diviya bû. Ji bo wî jî Perîxanê xwe pêşkêş kiri bû.

Dinê bihar bû. Her der bi hêşinayî û bi ku'lîkên ren-gareng xemilandî bû. Perîxan, bi cilên hevrîsim spî, bi bejna xwe a zirav, bi porêñ xwe ên reş û çavêñ xwe ên dilbirîn spehîtiya ku'lîkên biharê bû.

Perîxanê bi navê bajêr ji hakim re ku'lîk pêşkêş bikerana.

Perîxanê ku'lîkên xwe danî bûn di nav sepeteke pi-çûk û xemilandî. Li bin ku'lîkan bimbêk hati bû veşartîn.

Niho Perîxanê sepet di destêñ xwe de girti bû û weke periyeke ë di nav esker re dimeşıya. Çavêñ xelkê lê bûn û heyran û mest lê dinihêrtin.

Hevalêñ Perîxanê, şesderb û bimbe bi dest ve, hêdî... hêdî... xwe dixistin paşıya esker. Hinekan jî dora qışlê digirtin.

Perîxan giha çadirê hakim. Hakim rabû, çû pêşîya Perîxanê û destê xwe dirêjî selikê kir. Di vê gavê de, Pe-rîxanê selik rakir û çiqas jê dihat hewqas bi xurtî ew xiste erdê. Di nav toz û dûmanê da her tişt winda bûn...

Ji aliyêñ din dengê tifing û bimban dihatin. Lê pir dom ne kir.

Romî bê serek ne dikarîn xwe li ber agirêñ hevalên Perîxanê bigirin. Kurd ketin qışlê û ala xwe çikandinê.

Piştî çend saetan, hevalên Perîxanê ên serdest hatin ciyê bimbê. Ji ax û kuç pê ve tu tişt xuya ne dibû. Hinnekî kolan: laşê Perîxanê di ser yê hêkim re dîtin. Pen-cêñ wê li stoyêñ wî kilît bû bûn. Hevalên wê bihin ji ber xwe çikandin û sekinîn. Paşê bi hirmet laşê wê derêxistin û ew li ser destêñ xwe di nav bajêr de gerandin.

Ji aliyêñ din nûçeyêñ serdestiya kurdan dihatin. Xelkê hêstirêñ şîn û şahiyê dirijandin û giyanê Perîxanê di tava ala rengîn ne diçirisî û ji giyanê bavê xwe re dike-nî.

*Hawar, hej. 37, Kanûna pêşin 1941*

## XATÛN AN PILING

*Ji Frank Stocken*

Di wextekê de padişahek hebû. Fikrên vî padişahî ne wek fikrên ên din bûn. Fikirine wî ên ecêb hebûn. Di wexta wî de padişahan ji bo şahiya xelkê xwe, di cejin û dawetan de peya û dehbe berdidan hev.

Lê vî padişahî ji vê adetê re tiştekî nû zêde kiri bû. Di van temasañ de ne bi tenê xelkê kêf dikir; lê peyayêñ qenc xelat û ên xerab dihatin ceza kirin. Gava mirovek bi xerabiyê dihate îtham kirin ew tavêtin hepsê û piştre ew tanîn meydana temâşê. Wexta meydan ji temâşage-ran tiji dibû û padişah li ser textê xwe rûdinişt temâşa dest pê dikir.

Di dawiya meydanê de, li cem hev du deriyêñ wek-hev hebûn. Girtî di meydanê re derbas dibû û diçû û derîk ji wan deriyan vedikir.

Eger girtî deriyê sûcan vekira, jê pilingekî birçî derdi-ket, xwe tavêt ser wî û ew dikir perçe perçe. Hingê xu-ya dikir, yan padişah welê bawer dikir ko mîrik bi sûc e û bela xwe dîtiye.

Lê ko mîrik deriyê din vedikir, jê xatûneke ciwan û delal derdiket û padişah ew xatûn ji mîrik re mehir di-kir û xelkê ji şahiyê ji wan re li çepikan dixist. Mîrik bi jin jî biwa padişah jê re ew jinik jî dida. Ji ber ko bi ve-kirina vî deriyî mîrik şanî dida ko bêşûc e û zilamekî qenc e.

Li cem qiralan ev isûl pir hêja bû. Ji ber ko bi carekê de peyayêن xerab bela xwe û peyayêن qenc mikafata xwe digirtin.

Xelkê jî hejî vê tewâsiyê dikir; temasake bimeraq. Xelk gava ko dihatin temasagehê û hetanî ko girtî deri-yek vedikir, wan ne dizanî gelo ewê dawetekê an kuşta-rekê bibînin. Piling carina ji vî deriyî û carina jî ji wî deriyî derdiket.

\* \* \*

Keçikeke padişah e delal hebû û li ber dilê wî gelek ezîz bû. Wê keçikê, dizîka, ji peyayê serayê hejî xorte-kî mîr û çeleng dikir. Lê ji ber ko ew xort ne ji mîrekan

bû hejkirina wî súcekî mezin bû. Ji lewra gava padişah bi evîna wan hesiya ew xortê delal avête hepsê. Li gora isûlê wî ev xort jî wê biçawa û di temasagehê deriyek wê vekira. Bi vî awayî wê bihata zanîn hejkirina keça padişeh lê dibû súc an ne. Herkesî û padişah jî dizanî ko ev tişt lê súc e. Lê adet û rêzik diviya bû bihata cî. Ji ber ko súc mezin bû di welêt de li pilingê xurtir û xatû-na çêlengtir geriyan.

Roja hikim hat. Xelk bi tofan dicûn temasagehê. Cih hemî tijî bû bûn. Herkesî xwe ker kiri bû. Ewçend ko teptepa dilê xelkê wê bihta bihîstin. İşaretek hate dayin û xort kete meydanê. Çiqas bibêjin û rift û zirav, çiqas mér û spehî dixuya. Li xwe zîvirî û serê xwe li padişê nizim kir. Lê, lê ne nêrî çavêن wî dicûn dotmîra ko li cem bavê xwe rûniştî bû.

Dotmîr ne xwesti bû li mal bimîne. Hati bû ko qeder û sernivîsa girtiyê xwe bibîne. Ji roja ko evîna wan bû-bû eşkere dotmîrê ji evîna wî pê ve her tişt ji bîr kiri bû, niho wê çi bikira? Tiştek kiri bû ko heta wê wextê ji destê tu kesî derneketi bû. Ewê sira deriyan derêxisti bû. Belê ewê dizanî kîjan derî keçik kîjan derî piling ve-dişere.

Dotmîrê ne bi tenê deriyê keçikê lê keçik bi xwe jî nas dikir. Keçika li paş yekî ji her du deriyan veşartî ji

xatûnê qesrê a xweşiktir bû. Dotmîr ew xweş dinasî. Ewê çend caran bi çavêن xwe dîti bû ko keçika li paş derî bi çavêن evînê li dilgirtiyê wê nêrî bû û carekê du caran jî dotmîrê bawer kiri bû ko dilgirtiyê wê jî li nêrî-nêن wê keçikê vegerandi bû. Û dawiyê, rojekê dotmîrê ew dîti bûn ko bi hev re daxaftin. Vê keçikê wêrî bû li dilgirtiyê dotmîrê binêre û pê re baxêve. Ji lewre dotmîr lê hati bû xezebeke gur û kûr...

Gava xort serê xwe ji padişah re xwar kir û li dotmîrê nêrî bû; çavêن wî jê dipirsîn: kîjan? Xort dotmîr xweş nas dikir, qudra ta wê dizanî; bêşik dotmîrê sira deriyan derêxistiye. Ji lewre xort li dotmîrê gelek bi hêvî nêrî. Çavêن wî jê pirsî bûn û xort zanî bû ko pirsiyariya wî jê re eşkere bûye. Diviya bû lê vegeŕine.

Dotmîrê piçik destê xwe rakir û ew ber bi aliyê rastê bada. Ji dilgirtiyê wê pê ve tu kesî ew ne dît. Ji ber ko her kesî çavê xwe berda bû xort û awirên wan ber bi deriyan diçûn. Xort ne sekinî, bi mêranî û bi gavine lez ber bi deriyan çû. Dilên temâşageran qey sekinî bûn, herkesîbihna xwe girti bû. Xort ber bi deriyê milê rastê ve çû û deriyê rastê vekir.

\* \* \*

Niho, tîjika çîrokê ev e. Gelo ji deriyê ko hate vekirin piling an jinikek derket? Herçend em vê meselê didin eqilê xwe çend cihaba wê çetîntir dibe. Ji ber ko dotmîr pir hejî wî peyayî dikir û bi hêsanî ji yeke din re terka wî ne dida. Carina di xewnêن xwe de didît ko dilgirtiyê wê derî vedikir û pilingekî birçî xortê wê didirand. Carinan jî xewinîne din dîtin: didît ko derî vedibû û keçîkek jê derdiket û bi dîtina keçîka ciwan xort şâ û dilxwêş dibû û xelkê ji wan re çepik li hev dixistin û ji kêfê didan ber qîran. Dîsan dotmîrê dîti bû ko wî xortî ew xatûna çeleng wek jina xwe biri bû mal û qet li evîna wê ne pirsî bû. Ma bi carekê mirin jê re ne çêtir bû?

Bi saetên dirêj ve, bi şev û bi roj dotmîr dama bû. Ewê çi bikira? Ewê dizanî ko xort deriyê xêrê jê bipir-siya. Dawiyê dotmîr qerara xwe da bû û gava xort jê pirsî bi lez destê xwe rakiri bû û deriyê aliyê rastê şanî wî da bû.

Gelo dotmîrê kîjan derî bijarti bû? Ez bi xwe nikarim ji vê pirsîyariyê vegeรînim. Ji lewre ez wê ji we hemiyan re dihêlim: Ji derê ko hate vekirin çi derket, piling yan xatûn.

*Hawar, hej. 44, Gulan 1942*

## DÊ AN XÛŞK

*Frank Stocken*

Li golekê, xor tek dê û xûşka xwe di sendalekê de di gerîne. Dinê bihar e. Bayekî şêrîn li ser rûyê avê ê şîn pêlên sivik çêdike û wek dergûşekê sendalê dihejîne. Di bin şîrgermiya tavê de kulîkên doraliyên golê bi giranî hildibin. Wek xanimên çeleng û xemilandî bi pozbilindî li hev dinêrin û ji xwe pêve tu kesî naecibînin.

Sendal, bi stran û ken û peravan dûr dikeve. Xort li dê û xûşka xwe dinêre; ji şâ û kêfxweşbûna wan, xwe çiqa bextiyar dizane û heşmetkar li diya xwe a pîr, lê hîn çeleng û narîn û li xûşka xwe a ciwan, şepal û dîlber temaşe dike.

Ji nişka ve, ji livîna yekê ji wan sendel diqulibe û her sê jî dikevin avê. Ji xort pêve ne dê û ne jî xûşk bi melevaniyê nizanin.

Xort hewar û zarînên wan dibihîse û cigera wî diperi-

te. Her diwan pevre nikare xelas bike; ewê yekê ji wan  
bibijêre: kî gelo? Xûşk an dê?

Ez dikim nakim tu tiştî tê dernaxînim. Ka hon jî pê  
mijûl bibin û hinekî xwe biêşînin...

*Hawar, hej. 44, Gulan 1942*

## **SERÊ MÊŞA**

Di mala vî camêrî de, piraniya wextê xwe yê panzde rojan, min bi mêşkuştin û bi mêsqewirandinê derbaz kir. Ez derewa nakim gava ez van tiştan dinivísim. Binêrin çawan: Di rojên pêşin de ez di oda piçûk de, di ya nêzîkî dehlîzê de, radizam. Ev... jî, kurê S... yê navîn, hîngê 17 salî, li wê radiket. Di îşê bîleta de kar dikir. Lawikekî hûrik, bê laş û gewde û rengnexwêş bû. Lê di karê xwe de sivik, xortekî çav vekirî, mêt û kurdperwer bû. Êvaran, berî ku ez xew ve herim, ewî bi pirsêñ xwe û bi şev jî bi xirxira xwe ez gêj dikirim. Dinya havîn bû û serê sibê, roj gelek zû hildihat. Berî ku roj derkeve, S... ji bo nimêja sibê radibû û nema dihat, Ev... şiyar dikir ku here ji firnê, nanê taxê yê tenik bikire.

Gava Ev... ji xew radibû, derdiket û diçû, ez şiyar dikirim. Bi ser de jî, deriyê ku dikete rojhelat, vekirî di-

hişt; bi vî awayî bi tîrêjên rojê ve tabûreke mêşan jî xwe davête hundir. Ji germiya tavê û vingevinga mêşan xew êdî mimkin nedibû. Ez, hîngê, radibûm, mêskuja ku, ji êvarê de min xistibû bin doşekê, dikire destê xwe û bi mêşan diketim. Gava min dawiya wan tanî û ode bi laşen wan radixist, saet dibû şeş, şeş û nîv. Hîngê barbar, qîrîn û girîna piçûkên malê dest pê dikir. Hinek diçûn dibistanê û hinekan jî li malê pev diketin. Yê hîn di dergûşê de, zarîna xwe digihandin heya ezmanan.

G..., keça S... ya piçûktır, ne bi tenê bi vizvizî, lê bi qirêjiya xwe jî, ji xelkê malê re rahetî nedîhişt. Du salî bû, lê hîn bi xwe nedikarî û di derpiyê xwe de dikir û paşê pê hev jî dikir. Diya wê ya reben, êdî nedizanî he-ma xwe pê mijûl bike an bi kar û şixulên malê rabe. Carna, piştî guharandina wê bi saetekê, gava dê, li metbaxê xwarina xwe danîbû ser êgir û nedikarî xwe jê dûr bêxe, G... derpiyê xwe ji nû ve dadigirt, paşila xwe bi zor dikişkişand, diçû metbaxê û li dora dê û tencera wê ya li ser “papora” pêxistî ya li erdê digeri-ya. Diya wê dikir, nedikir, ew ji wê derê bi dûr nedixist. Rojekê, li ber çavên min, li metbaxê, li kêleka beroşa ya li ser êgir, vê keçika ha, bêtirî saetekê dawa diya xwe girtiye, li wê maye û kûziyaye. Êdî, we bidîta, mê-şen ku lê kom bûbûn, li ser siwar dibûn û laşê wê yê

piçûk dinûximandin.

Ji merovekî ku li ciyekî welê hatiye dinê ku ne bi tenê paqijitirê Kurdistanê, lê, yê cihanê ye; ji bo merivekî ku di piçûkahiya xwe de, li ber destê diyeke welê mezin bûye ku, ji ber paqijiyyê, nexweşiyeye dil pê re peyda bûbû; ji merivekî ku di mala birayekî doktor de mezin bûye ku ji bo ku wan hînî paqijiyyê bike, li nexweşen xwe dixist; ji bo merivekî ku bi salan ve li Swîsrê maye, ji merivekî ku ji piçûkiya xwe de, berî ku xwarinekê bibe devê xwe, mîna kûçika, ew bêhn kiriye, ev dêmen (menzere) û ev bêhn ji mirinê dijwartir bûn.

Lê, ji tirsa ku ez wan bixeyidînim, min xwe nedikir tu tişt nedigote wan. Û gava li ser sifrê, xwarin datanîn erdê, û G... şûştî û bi cilên guharandî, di hemêza dê an bavçe xwe de rûdinişt, bi xelkê malê re, bi hevre, bi dîlxweşî, min zikê xwe têr dikir.

Lê, berî ku xwarin pêk bê, ez diketim oda navîn, a me tê de dixwar, û bi saetan, min xwe bi kuştina mêşa mijûl dikir. Carna, min ji wan du, sê heb bi derbekê tanîn xwar; hîngê, wek “pêşmergekî” qehreman, min ji S... an ji jin û zaroyêni wî re digot: “Dilê xwe geş bikin, ka ji we re çend Ba’asiyên sekîtî!...”

Hingê, li Şamê bi tenê rojnameyek derdiket, ew jî ya Ba’asiyan, Ba’as bi xwe bû. Her roj, piştî nîvro, S... hêjmarek ji min re tanî. Tiştên vê rojnamê yên baş ev bend bûn ku davêtin Cemal Evdinnasir. Nivîsandinê

wê yên din nedihatîn xwendin. Berî ku paldim û dest bi xwendina wê bikim, midetekê, ez dîsa bi qîrkirina “Ba’asîyên” xwe radibûm.

F... keça S... ya mezin, xudiya oda navîn, hez dikir ku ez xwûna wan li ser çerşefen textê wê yên spî birijînim. Lê min bi ya wê nedikir. Ji lewre, carna ji min aciz dibû, ji odê derdiket û diçû, li derve, bi dengekî bilind, dilmayina xwe ji min re dida gihadîn. Lê min guh nedidayê, ji ber ku, ji min nedihat ku ez wan berdim, ji destê min bifilitin.

Bi qelandina wan bi tenê laş, guh û çavêن min rahet dikir, lê welê dihate min ku, ev mêsên ha, li ber çavêن min, bi rastî bûne “Ba’asîyên” bi goşt û gewde. Bê hemdê min, bi kuştina wan bêhna min derdiket û dilê min pê geş dibû. Di vê midetê de, di şerê mêsan de, min du mêsruk jîşandin...

P. H. : Di sala 1963, meha gulanê de Ba’asî, piştî ku navê min danîn ser “Lîsta reş” hatin ku min bigrin. Ez ji destê wan filitîm û berî ku birevim, bêm Libnanê, ez li Şamê du mehan veşartî mam. Di vê midetê de, ez bûm mîvanê 5 malên kurdên camêr. “Çiroka mîşa” li mala S... derbaz bûye.

*Hêvîriya Welêt, hej. 3, Newroz 1965.*



Nûredîn Zaza yek ji endamê ekola Hawarê yê herî xort û herî zîrek bû. Bi alîkariya kekê xwe Dr. Nafiz ew bi salên xwe yên ciwan meyla xwe berdide ser pirsa kurdan û heta dawiya jiyana xwe jî didomîne.

Ew hê di zaroktiya xwe de sîrgûn dibe û her li sîrgûnê jî wefat dike.

Nûredîn Zaza di jiyana xwe ya sîrgûnê de ci di warê siyâsî de, ci jî di warê intelektuelî de xebatêن hêja dike. Lê yek ji xebatêن wî yê herî hêja çîroknivîskariya wî ye. Ew li gorî dema xwe çîroknivîskarekî bijarte bû. Me jî wek **Weşanên Nûdemê** berhevkirin û çapkirina çîrokêن vî rewşenbîrê kurd ji xwe re mîna berpirsiyariyekê dît.